



24915

1. Mag. St. Dr. P









24915

I











1859

1856

1857

1858

1859



9804



1887. IV. 112.

DEDUCTIO  
JURIS ET FACTI,

QUA,

SERENISSIMO AC POTEN-  
TISSIMO

BORUSSIAE

REGI,



JUS, PROPRIAS DEDU-  
CENDI RATES SEU PONTO-  
NES IN FLUMINE VISTULÆ  
CONTRA POLONOS  
ASSERITUR.

---

ANNO MDCCXXXIV.





21915





# FACTI SPECIES.

## CAP. I.

### §. I.



On heri aut nudius tertius demum medium Vistulæ flumen Poloniam à Borussia separat, sed aliquot jam effluxere secula, cum hic terminus innotesceret. Constat quippe Fratres Teutonicos primum totius fluminis dominium acquisivisse, ita ut Vistula generatim finiret Borussorum pagos terrasque, ac pro accessione esset, nec quidquam Poloniseo in fluvio juris competere crederetur: donec, fatalibus quibusdam præliis inter crucigeros & Polonos commissis, in alium statum res deveniret



Casimiro magno regnante, qui cum Ma-  
 gistro ordinis supremo Joanne Desemero  
 seu Tusenero his conditionibus A. 1349.  
 pacem pepigit: *Notum sit universis tam præ-*  
*sentibus quam futuris præsentium notitiam habi-*  
*turis, quod nos Casimirus Dei Gratia Rex to-*  
*tius Poloniae, cupientes nos Terrasque nostras*  
*ac Incolas ipsarum in pacis amœnitate conserva-*  
*re, facimus & ordinamus inter Nostras Terras*  
*Cujavia videlicet & Poloniae parte ex una & Re-*  
*ligiosum ac Magnificum virum Dominum Hen-*  
*ricum Tusener, Magistrum Generalem Ordinis*  
*Fratrum Domus Teutonicae & suum Ordinem ac*  
*Terras ipsorum Culmensensem videlicet & Pomer-*  
*niae, parte ex altera, veras GRANITIES &*  
*perpetuo duraturas, incipiendo ab ultima Gra-*  
*nitia districtus Nessoviensis & demum descen-*  
*dendo per Vislam usque ad quandam villam Be-*  
*zendorff vulgariter dictam, ad Abbatem de Bis-*  
*sovia pertinentem, ubi Granitiæ reincipiunt*  
 Terræ



Terræ Pomeraniæ supra dictæ, ita tamen quod  
 ubicunque littus Terræ Cujaviensis prædictæ,  
 nostrum fuerit, ibi pro Granitia MEDIUS  
 Visla, sive Alveus ejus habeatur, & quicquid  
 in Insulis & piscaturis & aliis utilitatibus qui-  
 buscunque, à medietate prædicta nostra ex par-  
 te Utilitatis vel Commodi poterit inveniri, ad Nos  
 & Nostros Successores, Dominos Cujaviæ legi-  
 timos, & ad Terram Cujaviæ prædictam debe-  
 bit pertinere, omnis tamen homo Vislam tran-  
 siens infra Granities prænotatas à coactione qua-  
 cunque ad deponendum ipsius res, bona seu mer-  
 ces, nec non & ab exactione & solutione pecu-  
 niæ cujuscunque & impedimento quolibet liber  
 erit, nec ad solvendum prædicta per quempiam  
 compelletur, limites vero Cujaviæ & Pomer-  
 niæ sunt hi &c. Actum & datum in Transaz,  
 decimo octavo Julii Anno Domini Millesimo tre-  
 centesimo quadragesimo nono. &c.



## §. II.

Quæ pacis tabulæ, **FUNDAMENTUM** erant secundi fœderis ab Vladislao II. Jagellonio cum Paulo de Rusdorf initi. Polonis namque ægre ferentibus Casimirum ad pacem potius, quam bellum animum inclinasse, atque interea magno Lithuanix Duce Jagellone in regni solium eveſto, Lithuanis incentoribus facile re-  
 cruduit discordia, nec prius ſopiri potuit, quam A. 1436. quo cum memorato Vladislao Poloniæ ac tandem Hungariæ Rege variis bellis implicito, crucigeri rursus in concordiam rediere his verbis: Quod per descensum intrante fluvium *VVisla*, iterum descendendo per *VWisla* inferius, ipse **MEDIUS FLUVIUS VISLA** erit iterum limes inter Regnum Poloniæ & Terras Magistri & Ordinis Prusiæ, cum omnibus suis Insulis piscaturis iuribus & obventionibus universis, nullis exclusis  
 peni-



penitus & exceptis, usque ipsa **MEDIETAS** prædicti fluvii **VVisla** tanget locum limitum, quem quondam Serenissimus Princeps Dominus **Casimirus** divæ Mem. Rex **Poloniæ** cum Magistro **Prussiæ** dicto **Duschmar** inter terras **Bydgoſtensis** & **Pomeraniæ** certis literis & signis notabilibus limitavit, descripsit & distinxit, **Castro Jassyenetz** in Terris Ordinis permanente.

§. III.

Quæ concordia etsi pax appellabatur perpetua, non ita tamen firma manebat ac stabilis, ut ne quadantenus ab ea recederetur, inprimis cum **Borussiæ** civitates inter se magnas simultates agerent & **Ludovicus** ab **Erlichshausen**, sic dispensante fatorum providentia, eo adigeretur, ut paulo iniquioribus conditionibus sibi cum **Casimiro Jagellonio** A. 1466: esset paciscendum, ac multæ cedendæ arces, villæ, terræque in quibus tum dominium



nium directum, & utile, tum merum & mixtum imperium dicto Regi fuit tributum, cum piscaturis, fluviiis, agris, mari, insulis & *pertinentiis universis*. Ex quo tamen neutiquam inferendum, crucigeros omnia jura sua uno ictu amisisse. In iisdem enim pacis tabulis signanter exprimitur, quæ loca penes ordinem manerent Teutonicum, quæve ad eorum pertinerent ditionem; & sicuti Polonis reservata sunt flumina cum urbe Dantiscana & mari, aliisque castris & territoriis; ita in descriptione portionis Teutonicorum Equitum disertam mentio est injecta AQUARUM, sub quibus haud dubie Vistula comprehenditur, qui tum alluebat fines crucigeri ordinis, ceu iste adhuc attingit terminos Borussiae ab Alberto, Serenissimo Marchione Brandenburgico primum Ducatus nomine acquisitæ. Unde nullo nego-



negotio patefit, Polonis Pomerelliam secundum antiquos limites esse relictam, item Narigam cum fluviis ac piscaturas, quæ sunt in cauda maris, alias *Hap* dicti; quemadmodum vicissim Teutonico ordini, secundum pristinos terminos terræ, villæ ac castra sua cum AQUIS & eorum juribus sunt reservata, non excluso flumine Vistulæ, sed sub aquarum generali vocabulo simul comprehenso,

§. IV.

Quæ interpretatione cuiquam peregrina videretur, usu venit, ut in pace perpetua Sigismundi Regis cum prælaudato Marchione & Duce Borussia primo A. 1525. coalita navigandi & trajiciendi facultas in omnibus Borussia fluminibus universis & singulis Principatus incolis solenni ratione sit concessa; idque in renovatione omnium privilegiorum A. 1526, ad  
B huc



huc clarius legitur expressum. Verba sunt: *Ut liceat eidem una & hæredibus suis per totam Terram nunc concessam ad commodum suum, Passagia & telonea ordinare secundum Contractus præscriptum, Nundinas & fora statuere, Monetam cudere, pro Contractus formula, talia & alia jura taxare, directuras per Terram in FLUMINIBUS & in mari sicut utile visum fuerit, stabilire, denique jurisdictionem potestatemque illam habeat & exerceat in terris suis, quam aliquis Princeps Regni Nostri melius habere dignoscitur in terra, quam habet.*

§. V.

Quinimmo ne dubium amplius superesset ullum, ipse Sigismundus Polonia-  
rum Rex A. 1529. disertis verbis non solum  
privilegia memorata sancte confirmavit;  
verum etiam foederis cum Paulo de Rus-  
dorfficti, adeo clare meminit, ut id per-  
petuo



petuo observandum decerneret; idque ad posteritatis memoriam litteris solennibus inferi curaret. Sunt autem istæ sequentis tenoris & argumenti:

*In Nomine Domini Amen.* Sagax humanæ naturæ providentia, labilitate memoriæ suæ pensata, prudenter adinvenit, ut gesta hominum memoratu digna, ne sub temporum vetustate oblivionis caligine obducantur, literarum monumentis & Ministerio posteritatis, prodantur notitiæ. Ad perpetuam proinde memoriam nos Sigismundus Dei Gratia, Rex Poloniæ, Magnus Dux Lithuanie, Russiæ, Prussiae, Samogitiæ, Masoviaeque Dominus & hæres. Significamus tenore præsentium, quibus expedit universis & singulis, præsentibus & futuris harum notitiam habituris. Quod licet dudum jam inter Serenissimum atque illustrissimum olim Principes, Dominos VLADISLAUM REGEM Poloniæ & Alexandrum VI-

B 2

TOL-



**TOLDUM** Magnum Ducem Lithuaniae, Præ-  
 decessores & Avos nostros charissimos eorumque  
 Dominia Regnum & Magnum Ducatum ac ter-  
 ras ac populos eis subiectos, ex una: & venera-  
 bilem & magnificum olim Dominum **PAULUM**  
**DE RUSDORFF**, Ordinis Hospitalis Sanctæ  
 Mariæ Teutonicorum Hierosolymitani in Prus-  
 sia Magistrum generalem **EJUSQUE ORDI-**  
**NEM**, terras & populos ex altera partibus,  
 omnibus & singulis guerrarum ac differentiarum  
 inter partes ipsas hinc quomodo libet extortis di-  
 spendiis & anfractibus sopitis & extinctis, fœdus  
 pacis perpetuæ firmiter & inviolabiliter utrinque  
 tenendum & observandum initum sit & contra-  
 ctum certis & authenticis litteris, seu inscriptio-  
 nibus communitum & roboratum. Ne tamen  
 unquam futuris temporibus, quorum vetustate  
 Conditionum varietas afferri solet, aliquid de &  
 super Contractu ipso ambiguitatis quoquo modo  
 exoriat, in detrimentum ipsius pacis perpetuæ  
 &



& Concordiæ: qua nihil humanæ vitæ conduci-  
 bilius est, & commodius & contra, discordia re-  
 bus humanis nihil perniciosius; volentes itaque  
 Dominiorum & Subditorum tranquillitati ad fu-  
 tura etiam Secula consulere, nec non optatis &  
 petitioni illustris Principis Domini Alberti, Mar-  
 chionis Brandenburgici, ac in Prussia, Stetini,  
 Pomeraniæ, Cassubiorum, Sclavorum Ducis,  
 Burggravii Noribergensis, Nepotis nostri cha-  
 rissimi, innovationem Contractus ipsius fœderis,  
 pacis perpetuæ fieri exoptantis, benigne annu-  
 entes, Contractum ipsum fœderis pacis perpetuæ,  
 ita ut præmittitur inter divos olim Prædecessores  
 nostros, Regem & Magnum Ducem prædictos,  
 & ordinem Dominiæque & terras partis utrius-  
 que initum, in literisque circa lacum Melno  
 apud flumen Ossa datis, & in aliis descriptioni-  
 bus desuper secutis, contentum & descriptum  
 nostro & illustrissimi Principis Domini Sigismun-  
 di Augusti in Magnum Ducem electi, filii nostri



*charissimi, nominibus: ac inter nos & ipsum filium nostrum, Dominiumque nostrum, hunc Magnum Ducatum Lithuanie ex una: & præfatum illustrem Principem Dominum Albertum Marchionem Brandenburgensem in Prussia Ducem, Nepotem nostrum charissimum, ejusque Ducatum & terras Prussie, & populos ei subiectos ex altera partibus: refricandum seu innovandum duximus innovamusque, atque per præsentem innovamus: & propter evidentiores hujusmodi innovationis notitiam Articulos infra scriptos, & tenore literarum seu inscriptionum antiquarum nihil penitus immutando extractos præsentibus duximus esse inserendos,*

§. VI.

Jam vero extra controversiam positum est, in fœdere inter Vladislaum & Rusdorsium paciscentibus utrinque placuisse, ut Vistula pro medietate Polonis, ac pro altera medietate Ordini Teutonico addi-



addiceretur; cui juri tum prægloriosus  
 Borussæ Dux Albertus, tum filius ejus Al-  
 bertus Fridericus secure innitebantur, in-  
 primis cum huic rei litteræ investituræ no-  
 væ magnopere faverent, & potentissimus  
 Rex Sigismundus Augustus d. xix. Julii A.  
 1569. Borussæ Territorium, *flumina, pesca-*  
*turas, aquas aquarumque decursus, sicuti illas*  
*quondam Magistri generales & Ordo habuere*  
 liquidis verbis concederet, quæ hoc loco  
 haud temere subjicimus, ne qui remaneat  
 in mente Lectorum scrupulus: *Damus au-*  
*tem & concedimus Celsitudini suæ, cum illius Suc-*  
*cessoribus feudi legitimis in perpetuum & indivi-*  
*duum feudum omnes Ducatus Prussæ terras, Ci-*  
*vitates, oppida & Arces, videlicet Arcem Kö-*  
*nigsberk &c. &c. (ubi recensentur terræ, civi-*  
*tates oppida & Arces) cum omnibus & singulis*  
*Subditis, Vasallis, fructibus, Dominiis, Supe-*  
*rioritatibus, libertatibus & juribus, una cum*  
 omni-



omnibus Arcibus, Civitatibus, foris, villis, Man-  
 sis, Curüs, Molendinis, Molendinorum locis,  
 Censibus, Vectigalibus, redditibus, theloneis,  
 Servitiis, feudis spiritualibus & secularibus, la-  
 cubus, fluminibus, piscationibus, agris, aqua-  
 rum decursibus, ferarum lustris, ferarum mea-  
 tibus, Venationibus, Sylvis, Nemoribus, pa-  
 scuis, pratis, actibus, etiam cum omnibus Me-  
 tallis, quæ modo sunt, seu in futurum fieri pos-  
 sunt, Auro, Argento, Cupro, Stanno, plumbo,  
 & Salinis, supra & subter terram, similiter una  
 cum omnibus & singulis juribus, eminentiis &  
 pertinentiis, nullis penitus exceptis, sicuti isti-  
 usmodi terras, quondam MAGISTRI GENE-  
 RALES & Ordo habuere, & usque ad nuperri-  
 me gestum bellum usu & fructu tenuerunt, im-  
 posterum perpetuo & hereditarie in commune &  
 individuum feudum tuendas, fruendas, utendas &  
 possidendas, &c. &c.



§. VII.

Qui vero jus fluminum habet, is quoque fluviales fructus ac census merito colligit, molendina exstruit, piscatur, facultatem vehendi & trajiciendi homines jumentaue, item navigandi & rates deducendi sine impedimento urget & exercet. Hinc minime mirum, ejusmodi census cum ceteris emolumentis ac commodis tum olim a Pomesaniensibus Episcopis, tum etiam, cum ille Episcopatus, per mutationem religionis, in plenum jus Borussiae Ducum transfret, illibato exercitio fuisse perceptos, idque loquuntur & indicant rationaria Insulae Sanctae Mariae, alique indices antiquiores, Nautarum in Stangendorf & Nebrau pensiones accensus sollicitè referentes.

§. VIII.

Et licet primi Borussiae Duces jus  
C pro-



proprias rates deducendi in Vistulæ flumine aliquandiu non exercuerint, factum id tamen est ex mero arbitrio, vel causis singularibus. Raro quippe eis locis Principes cum suis hunc fluvium trajiciebant; ipsique Poloni tamen erant discreti, ut gratis eos transveherent, ita ut minime necessarium tum temporis crederetur, proprias exstruere rates, quandoquidem sine sumtu trajetûs commode fieri poterat. Nec omittendum, ea ætate, quo Serenissimus Elector Joannes Sigismundus Regiomonti cum Alberti Friderici filia unica A. 1594. solennia nuptiarum celebraret, ejusque comitatus sat ingens cum legatis externis Vistulam trajiceret, Polonos non tantum rates suas benevole commodasse; verum etiam exiguo honorario contentos ea ratione sese gessisse, ut de propria vectura & rates deducendi exercitio ampli-  
ori



ori minime videretur cogitandum; inprimis cum inter Ducem Borussię & Capitaneum seu Starostam Neoburgensem paulo post convenisset, ut tertius grossus præfectis insulæ S. Mariæ pro jure trajectus exsolveretur. Quo ipso sicuti dominium alterius ripæ & fluminis pro medietate Poloni agnoscebant, ita communi consensu decretum est tandem, ut loco tertii grossi fixa summa trium marcarum annuatim penderetur, quæ summa valorem duorum thalerorum tum temporis pene æquabat.

§. IX.

Quo in statu res usque ad recentioræ ætatem & medium sæculi XVII. permansit, præfectique insulæ S. Mariæ in rationes suas tres istas marcas exacte retulere. Enim vero prima Ducum Borussię & Brandenburgicorum Marchionum linea exarescente ac successionis jure ad Sere-



nissimos Electores Brandenburgicos devolutum simul eveniebat, ut propter commercium cum aula Electorali frequentius, jus trajectus proprium urgendum magis videretur; præcipue cum pax perpetua cum Regibus Poloniarum inita, in qua medietas Vistulæ ceu olim, pro termino inter Poloniam & Borussiam fuit agnita, argumentum sat validum suppeditaret ad exercituum rates proprias deducendi tutandum.

§. X.

Hinc gloriosissimæ memoriæ Elector Fridericus Wilhelmus consilium haud temere cepit, propriis ratibus ut trajiceretur flumen. Mutato enim pecuniæ valore, non solum fixa ista summa trium marcarum nimis apparebat exigua; verum etiam novæ interveniebant causæ, quare Polonis solitarium trajiciendi jus demum dene-



denegaretur. Neque enim Starosta Neoburgensis, neque possessor Münsterwaldæ, cum copiæ Brandenburgicæ essent trajiciendæ, honorario volebant esse contenti, varias injicientes remoras, vagasque adducentes in contrarium rationes & quærimonias. Quibus præcidendis extractæ sunt rates, traducti exercitus, ac jus illud trajectus locatum Meiero Senatus insulæ S. Mariæ membro, qui per triennium continuum ab A. 1659. 1660. & 1661. pensionem ipsi impositam 433. Marcarum ac 10. grossorum accurate exsolvit: quod rationaria præfecturæ perspicue probant.

§. XI.

Quamquam vero Starosta seu Capitaneus Neoburgensis huic exercitio magnopere repugnabat; factum est tamen, ut, postquam Polonicæ rates ad ripam Borullici lateris appellere prohiberentur, is



tandem permetteret, ut propriis linitibus ad transvehendos ex Borussia homines ac res Brandenburgici uterentur.

§. XII.

Atque hæc quidem gesta sunt, cum pax Olivenfis coalesceret, atque vigore Brombergensium pactorum Respublica Polonica obstringeretur ad Elbingam pignoris nexu Electori tradendam. Quam traditionem ut in longum differrent, aut plane inanem redderent, inter varia commenta Brandenburgicæ Domus adversarii id quoque mirum in modum exaggerabant, Brandenburgicos propriis ratibus in Vistula uti, copias etiam Principum externorum pro arbitrio trajicere, multaque facere, quæ sint contra pacta moremque antiquum. Quorum figmentorum tela etsi Electoris administer liber Baro de Hoverbeck dissipare omni modo stude-

studebat, jura Principis sui accuratissime tutatus; fecit tamen singularis in pacem amor, ac longe prospiciens Electoris prudentia, ut exercitium juris trajectus A. 1662. tantisper suspenderet, ac Bredavium interea, qui civis erat Nebraviensis, ejusque heredibus tertium Veduræ grossum benignissime destinaret.

### §. XIII.

Et effluxit certe duodecim annorum spatium, antequam de hac controversia, paululum dilata, serio iterum agi coeptum. Nam anno demum 1674. cum Rex Joannes Sobieskius in solium eveheretur, sollicitante inprimis Electore, novo Regi in pactis conventis totius regni nomine est injunctum, ut relueretur Drahemium, cumque Brandenburgico Principe de copiis in auxilium regni mittendis deque jure trajectus in Vistulæ flumine, secundum pacta



paſſa priora, interveniente ſolenni com-  
miſſione, tranſigeretur. Sed neque re-  
luebatur Drahemium, neque commiſſio  
decernebatur, etſi Sereniſſimus Fridericus  
Wilhelmus promiſſo ſuo non defuit, ſed  
contra Turcas, tum temporis vehemen-  
ter Poloniam affligentes, exercitum in  
auxilium regni opportune ſubmiſit. Id-  
que ideo factum merito creditur, quod  
Poloni animadverterent, juſ trajectus  
proprium Electori nullo denegari jure poſ-  
ſe: hinc dilata commiſſio, vel potius ſuffla-  
minata. Qua ratione tantum abeſt ut  
Brandenburgico Principi atque nunc Bo-  
ruſſiæ Regi aliquid deceſſerit; ut potius  
eorum revixerit juſ proprios pontones  
exſtruendi & habendi. Eum enim in finem  
tantum ſuſpendit Elector exercitium ſu-  
um, ut tota controverſia pacata ratione  
per commiſſarios ſopiretur: qua ſpe eva-  
neſcen-

nescente non potuit non salva manere Serenissimo Borussiae Regi facultas proprias deducendi rates, atque emolumenta inde percipiendi consueta: Quod enim Polonis permissum, qui dominium dimidii fluminis habent; id certe & Borussiae Regi sine mora concedendum, qui pro altera medietate Vistulae Dominus est.

## CAPUT II.

### QUID A POLONIS OBJCIATUR IN JURE.

#### §. I.

**S**ed ajunt forte Poloni: 1) non adeo peregrinum videri, ut totum flumen parti uni accedat, nec deesse inter gentes exempla, nec argumenta: Cru-  
cigerorum imperium serius esse natum,  
D quam



quam Polonorum in Borussia; qui jam occupassent flumen; prioremque tempore hic merito potiozem credi jure. Addunt 2) observantiam pro veritate haberi, inque confesso interea esse Capitaneum Neoburgensem solum jus trajectus centum plus annis exercuisse; Duces Borussiae non item, nec Electores Brandenburgicos ac vix 3) consequi, tertium grossum Præfectis Insulae Marianæ esse solutum, ergo Dominium pro medietate fluminis à Polonis esse agnitum & approbatum; sed quidquid hac parte factum, tanquam ripaticum videri considerandum: facile enim contingere, ut, si appellant ad ripam rates & homines jumenta que transuecta eam conculcent, aliquid damni faciant, riparum dominis: quin 4) etsi Borussiae Principes habuissent jus exercendi trajectum, per non usum tot annorum  
illud

illud utique esse amissum & à Polonis præscriptum, cetera.

§. II.

Ad quæ ordine respondemus: 1)  
Fieri posse & contigisse alicubi, ut fluvius  
in genere finiat regna principatusque, is-  
que pertineat integer ad Dominum unum  
non binos aut plures ex utroque latere  
terras possidentes: sed hoc loco inprimis  
circumspicienda sunt pacta, in quibus ad  
medietatem Vistulæ Polonorum imperium  
dominiumque pertingit: quidquid ultra  
medietatem porrigitur, ex repetitis con-  
ventionibus ad Crucigeros Borussæque  
Duces jure pertinuisse evincitur: Quod  
in facti specie in clara luce est constitutum.  
Deinde falso utique similis est, Polo-  
nos totum flumen occupasse. In vulgus  
quippe notum est, qua in anxietate ver-  
sati sint Poloni, cum evocarentur Teuto-  
nici



nici equites. Sane totus Pomesaniensis tractus in infidelium potestate erat, quos publicis in litteris ipsimet Saracenos appellavere: & hos vero ordo Crucigerorum sub jugum redegit, eorum terras & regionem feliciter occupavit, Pomesanensem Episcopatum instituit, ita ut à veritate illico abludere videatur assertio, Polonos jam occupasse integrum flumen, Polonos, qui adeo timebant Borussos, ut Cæsarem Fridericum, ut Pontificem Romanum consulerent, quomodo sit suppressendus tam ferocis populi furor; cui sistendo ipsimet pares non essent. Ex quo merito inferas, Polonos utpote infirmiores dominium imperiumque in Vistula prorsus non habuisse; sed demum pro medietate in pace perpetua cum Paulo Rusdorfio in consortium certo fuisse admissos. Quod & supplementum Chronici Petri de  
de

de Duisburg luculenter innuit: Quibus omnibus ad licitum consummatis tandem Dominus Magister generalis cum suis necessitate compulsi eandem litis materiam ad omne beneplacitum Polonorum concordavit: videlicet per demolitionem castri Nassau, & assignationem **MEDIETATUM VVISSELÆ** & navigii in Thorun. Ex quo constat, ordinem Teutonicum habuisse iis locis integrum dominium fluminis, sed à Polonis coactum pro medietate illud tandem adversariis suis reliquisse. Quæ cum ita sint non necesse est sane confugere ad præsumptiones, secundum quas in dubio dominium cum imperio ad medietatem fluminis protenditur: Constat jam, quomodo hic terminus sit constitutus: ipsi Crucigeri Polonis hac parte flumen medium cessere, quod olim occupavere integrum.



§. III.

Cui fundamento sicuti totius controversiæ status innititur, ita quod 2) de observantia in contrarium differitur parum roboris ostendit. Minime enim negatur, Capitaneum Neoburgensem rati-  
bus propriis in Vistula jus trajectus exercuisse; sed id vero Borussia Regi non tam nocet, quam prodest. Quidquid Poloni agebant, id jure medietatis in flumine sibi competentis fecere: unde prona consequentia: ergo & Borussia Regi ejusque prægloriosis antecessoribus idem licuit, licetque: merique arbitrii fuit, Brandenburgicos aliquando propriis lintribus ad trajiciendum aptis non esse usos. Ad exercitium vero juris arbitrarii nemo cogitur. Possum altius tollere & ad cœlum ut loquuntur ædificare; Verum etsi centum ac pluribus annis non ædificem; neuti-  
quam

quam tamen jus ædificandi & tollendi al-  
 tius amittitur, quia id in mea libertate est  
 positum. Et adductæ sunt autem ratio-  
 nes sat graves, quare primæ lineæ Mar-  
 chiones ac Duces aliquantisper suspen-  
 derint exercitium proprias deducendi  
 rates; ac licet nulla causa suppetiisset,  
 facultas tamen manet facultas, domini-  
 um pro medietate manet dominium:  
 Quod interea ut conservarent claro  
 signo, & Poloni resciscerent, quid juris  
 esset in flumine Alberto Duci ejusque suc-  
 cessoribus, tertium tantisper grossum, ad  
 certam demum & fixam summam reda-  
 ctum 3) accipere; non ut semper eo se  
 contentos futuros declararent, sed ut eo  
 pacto dominium suum sartum tectumque  
 retinerent: quod satis erat eritque ad li-  
 bertatem flumen propriis navibus ac rati-  
 tibus trajiciendi defendendam. Neque  
 enim



enim ulla propterea novatio evenit aut totum dominium ad ripam Polonicam defluxit: sed, canone isto & fixo præstito, istud pro medietate, cum omnibus adjunctis & libertatibus est conservatum. Quod inprimis & cum cura est expendendum, quandoquidem prorsus improbabile & absurdum foret, dominium dimidium fluminis imperiumque pro duobus thaleris annuis esse venditum, aut cum ista summa permutatum. Unde finis sic paciscentium potissimum est considerandus, neque ex oculis dimittendus, qui ex parte Ducis utique fuit conservatio domini secundum pacta priora. Qui vero dominium sibi reservavit, etiam libertatem dominio annexam retinuit: quæ una cum aliis in eo quoque consistit, ut propriis ratibus transvehantur tum nostra, tum aliena. Unde summa illa ad finem & effectum re-

fer-

fervandi accepta non operatur aliquam acquisitionem de novo & integro: nihil enim in alterum transfert, qui quod suum est evidenti signo reservat, ac canone in stipulationem deducto, sic neque aliter se sentire sat valide indicat. Pro qua etenim re quæso, Poloni permisissent tertium grossum? Pro damno, quod sentirent Brandenburgici ex appulsu ad ripam? Atqui de tali detrimento neque sermo erat, neque cogitatio. Loquuntur pacta, quæ adduximus supra, de medio flumine Borussiam Poloniamque secante. Non occurrit contractus de vendendo, non item locatio & conductio, non denique permutatio: quidquid agebatur, eo profecto redibat, æquale jus esse utriusque rationis pro medietate fluvii: hoc urgebant Borussiarum possessores Domini, ac Duces; idque agnoscendum merito solli-

E

cita-



citabant : de ripatico nulla incidebat mentio; de ripa, quæ deterior fieret per appulsum utrique parti nunquam & nusquam aliquid in mentem veniebat: quin fixum istud trium marcarum *Arrhæ* potius loco erat, Polonos agnoscere iustitiam causæ neque Borussia Ducibus dominium unquam pro parte dimidia iri negatum cum reliquis adjunctis libertatibus & iuribus in re propria. Jam vero re in alium statum deveniente ac prima Ducum Borussia stirpe extincta Electoribus Brandenburgicis argumenta sat magni momenti occurrebant, quare dominium pro medietate Vistulæ alio modo, quam per exactionem tertii grossi sit asserendum. Conmeabant aulici ultro citroque, etiam procures, nobiles, cives, incolæ Borussia ad aulam Principis sui sæpius contendeant, Poloni vero, quod initio sine mo-  
ra

ra faciebant, transvectionem gratuitam abnuebant, ac, cum copiae essent trahendae de honorario pro arbitrio pendi solito moleste disceptabant, quae universa atque singula tum temporis tanquam conditio praeponebantur, cum ab exercitio proprios pontones habendi abstinerent Borussiae Duces atque Electores. Unde per se consequebatur, auferri obligationem ad tertium grossum accipiendum, quando mutabatur causa, & status in quo unice illa conventio fundabatur de non exercendis domini effectibus & annexis. Nec nocet, conditionem hanc nunquam perspicue fuisse adjectam, ac propositum vero in mente retentum nihil operari. Prorsus quippe negatur, propositum hoc in mente fuisse retentum. Exigebant ex pactis antecedentibus Borussiae Principes dominium pro medietate in Vistulae flumine: recognoscebant id Poloni praestando



tertium grossum: dominium fluminis autem post se trahit facultatem exstruendi proprias rates: neque id, inficias eunt Poloni, quia id juris ipsimet exercent adhuc: quare iterum in aprico constituitur, Borussis eandem competere libertatem, sicubi utilem sibi & necessariam animadverterent. Quo circa prægloriosus Fredericus Wilhelmus proprios ædificari pontones iussit; lintrarios constituit, copias trajecit; ac, quemadmodum fecere Poloni, homines, jumenta, res transuexit, idque per tricennium continuavit, ratus, conditionem memoratam Polonis fuisse notissimam atque in ipsa conventionē latere, ut, si res posceret, dominium fluminis agnitum & per solutionem certæ summæ approbatum, secundum pactorum antiquissimorum tenorem, expediretur pro re nata ad Electoris necessitatem ac

com-

commodum. Neque enim hoc loco renunciatio juris alioquin certissimi est comminiscenda, ubi nullum renunciationis vestigium occurrit. Et fictio vero admodum esset paradoxa, concipere renunciationem in re magni momenti; quæ non præsumitur, sed quia facti, probanda & quidem evidenter ac per probationes arduiores. Ubi vero sunt istæ probationes arduiores? Non est hic actus juri Electoris ac nunc Borussia Regis contrarius: potius in id incubuere Borussi, ut Poloni dominium ipsorum in Vistula pro parte agnoscerent, qui actus non tam juri Electoris, quod poposcit, & quod successores ejus poscunt adhuc, contrarius est, quam facultatem proprias rates exstruendi stabilit. Quando vero neque expressa è verbis, neque tacita voluntas renunciandi è factis apparet, frustra sane renun-



ciatio jactatur, & specialis quidem domini in medio flumine amittendi. Quod si Poloni in se descendentes bene expendant, quæ ratio & causa fuerit tertii grossi accipiendi & comparate præstandi, deprehendent facile, de asserendo dominium actum fuisse, non autem de ejus renunciatione. Quinimmo neque hic optio est, cujus interventu aliquis rei alteri renunciassent censetur. Quid enim elegerint pro dominio Vistulæ, ubi illa alluit Borussæ Ducatum? Duos thaleros annuos? Pudet dicere. Hujus tractatus causa ipsum erat dominium, pro cuius recognitione soluebant pauxillum Poloni. Itaque cadit electio & ex diversis causis, non contrariis diversæ actiones ortum trahunt. *Prima est recognitio domini in flumine è pactis publicis: altera* EXERCITIUM Domini à Polonis recogniti & factis

Ais & verbis. Prima actio est finita : al-  
 tera incepit & continuatur. Sed, inqui-  
 unt, suspendit Elector jus proprios Ponto-  
 nes habendi aliquamdiu & Bredawio ejus-  
 que hæredibus tertium grossum ex bene-  
 ficio concessit. Qui suspendit, reponi-  
 mus, nihil à se abdicat. Suspendio cau-  
 sam habuit singularem; quodque differ-  
 tur, non aufertur. Ratio illa singularis  
 futuri tractatus erant: Per hosce finitum  
 iri controversiam Poloni promittebant:  
 quin obstringebant ipsimet novum Regem  
 electum Joannem, ut decerneretur com-  
 missio & caula bene cognita satisfaceret  
 Electori. Sed evanuit commissio; nec  
 Electori nec Successoribus ejus est satisfac-  
 tum; ergo expiravit suspensio exerci-  
 tii. Rex Borussiae jure optimo maximo  
 id denuo exigit; nec, dominio fluminis  
 agnito, suspendi amplius exercitium po-  
 test;



test; nisi novo facto voluntatem contrariam declaraverit declaretque. Sed persistit Rex in iusta juris sui persecutione; nec causam habet ullam, quare longius differat, quod sibi ex pactis majorum merito debetur.

§. IV.

Igitur actum est de Polonorum argumentis, nisi forte 4) ad præscriptionis asylum infelicitè confugiant. At qui se præscripsisse dicit, ille alterum affirmat dereliquisse, aut alienasse. Verum tamen ubi sunt derelictionis vel certa, vel verisimilia signa? Qui dominium in Vistula dimidium toties urfit serio, libertatem extruendi rates proprias non sane derelinquit, quia, omnium JCtorum sententia, hic effectus est domini in flumine; cujus annexum simul extra controversiam positum videtur. Quid? quod qui rates

rates proprias exercuit, ipso jure & facto, itidem non derelinquit hoc jus speciatim per varia temporum spiramenta de poscitum: ut taceamus, eum qui amore pacis & ob promissos tractatus de negotio controverso exercitium suum, in mera sua facultate positum, suspendit, rursus nihil amittit, nihil alienat, nihil derelinquit. Applicatio ad factum sicuti facilis est, ac sæpius facta; ita placet quærere: quis præscribat rem meræ facultatis? Hæc facultas penes Borussæ Principes ac Dominos quiescebat, de qua disponunt iidem jure suo & naturali competente. Unde licet per centum annos neque piscati essent, neque navigassent, nec proprios pontones deduxissent, quia tamen facultas erat, quæ *sua sponte* apud istos paullulum quiescebat, quamdiu de facto non est adempta, sequitur, Successores



fores Serenissimos ea facultate adhuc posse uti. Nihil hic operabitur prohibitio & contradictio Polonorum. Quamdiu enim vicinis non est concessum dominium in Vistula plenarium, in auras abit eorum prohibitio ac repugnantia: quin vel cum incommodo eorum potest suscipi exercitium domini & quæ ex illo profluunt, quia continetur hujusmodi libertas in proprietate fluminis. Etiam nihil efficiet tempus, quia res meri arbitrii omissionem exercitii admittunt, ita ut inde nihil decedat non utentibus, nihilque de eorum facultate diminuatur. Nec obstare potest, quod propriis pontonibus navigando & trajiciendo intercipiatur vicinis Polonis commodum illud, quod ex intermissione juris alioquin competentis per longissimum tempus percepere. Id enim emolumentum non jure suo, ac ne  
quidem

quidem precario habuere, sed *mero casu*,  
eoque modo, qui nullam ipsis possessionem tribuit, adeoque nec facultatem Regis Borussiae ulla ratione potuit interciperre: neque illi sane damnum faciunt, sed lucrum, quod ad ipsos nullo jure perfectò, neque imperfectò, sed solo casu perveniebat, duntaxat amittunt. Ex quibus deduci ac confici potest hoc consuetudinarium: *Ea commoda, quæ percipimus ab alio vel ipsius rebus, non vi contractus, aut veræ possessionis, sed per ACCIDENS, & per consequentiam ejus status, in quo ipse remanere se, vel res suas mavult; ea, inquam, non debentur ab ipso, sed sine injuria ab eodem possunt eripi, mutato suo vel rerum suarum statu.* Potius gratulentur sibi Poloni eos utilitatem ex re aliena per accidens cepisse, ad quam nullum habebant jus, nullamque juris speciem. Nunc enim Borussia res mi-



nime patitur, ut ampliore liberalitate Poloni ditescant, Plura non addimus.

### CAPUT III. QUID IN FACTO OBJICI- ATUR A POLONIS.

#### §. I.

**Q**ui in jure succumbunt, factum satagunt pervertere, vel aliter narrare rem, ne jus sibi, utut legitime accommodatum, noceat. Hinc & Poloni factum solent immutare, &, quia non constant sibi, variis modis tentant informare. Non enim inquit, ad tractatus Vladislai Jagellonii cum Rusdorfio oculi sunt convertendi, sed ad pacta Casi-

Casimiri cum Ludovico de Erlichhausen:  
cui magna pars Borussiae fuit adempta;  
tot arces ac civitates ereptæ, flumina, pi-  
scaturæ, ac, nescio, quæ non ablata; cum-  
que hæc pacta sint posteriora, cetera  
priora hinc colligunt, non tam prioribus  
esse innitendum, quam posterioribus, in  
quibus curta Borussiae crucigeris suppellex  
est relicta.

§. II.

Atat supra jam, inque facti specie  
monitum est, illa fere Polonis esse relicta,  
quæ nunc complectitur Polonica Borus-  
sia; cetera in Crucigerorum potestate  
mansisse cum omni jure ac potentatu.  
Non est exceptus Vistulæ fluvius, non  
aquæ reliquæ; quid? quod *aquarum* di-  
ferre meminere pacta conventa. Nec

E. 3. quis-



quisquam cum Polonis de jure fluminum  
disceptat, ubi illi soli regnant habitantue,  
Verum ubi Borussiam Poloniamque Vistu-  
la in specie separat, Polonis dica merito  
scribitur, quoties soli dominium affectant  
& Crucigeri ordinis legitimos successores  
excludere cupiunt, inprimis cum in vul-  
gus notum sit, illa pacta Casimiriana bre-  
vi tempore integre perstitisse, sed novis  
turbis coortis armisque prehensis iterum  
fuisse maximam partem eversa: donec  
pax nova coiret inter Sigismundum Re-  
gem & Albertum Marchionem, novæque  
conditiones utrique parti arriderent, &  
solenni promissione confirmarentur. In  
hoc tractatu nulla pactorum Ordinis Ma-  
gistri ab Erlichshausen mentio est facta,  
sed potius pax Vladislai perpetua cum Pau-  
lo de Rusdorf ante oculos fuit constituta;  
quod supra è renovatione omnium privile-  
gio-

giorum A. 1529. à Sigismundo suscepta affa-  
tim fuit probatum. Jam autem subsumimus,  
in pactis cum Rusdorfio Vistula pro medi-  
etate Borussiae supremo est additus Ma-  
gistro; hæc confirmata ac renovata sunt:  
Vistulae medium flumen inter Poloniam &  
Borussiam horizon, seu finitor mansit igitur:  
quantumvis tantisper poneretur,  
Ludovicum ab Erlichhausen omnia fluvio-  
rum aquarumque suprema jura amisisse.  
Illa enim conventio rem totam ad pacta  
Rusdorfiana revocat, quibus standum, ni-  
si mutatio ex facto novo eliciatur, quod  
in æternum non fiet. Referens enim in-  
terpretationem ex relato accipiat oportet;  
idque quod in relato continetur, in  
referente quoque contineri JCtorum de-  
cretis, quæ fundamentum in ipsa ratione  
habent, stabilitur; cum dubium non sit  
principale illud esse, ad quod fit relatio.  
Igi-



Igitur conventio cum Rusdorfio hoc loco est illud principale; unde referens, quod est renovatio omnium privilegiorum, declarationem accipiat necesse est, ita ut relatio relatum ponat in referente non aliud, nec aliter nec alterius conventionis argumentum, quod in referente nec tacite nec aperte, aut claris verbis est indicatum. Ex quo mirari subit, Polonos substituere hoc loco moliri pacta Casimiri cum Ludovico ab Erlichhausen confecta, quæ pars referentis non sunt, nec nominatim, nec etiam per longissime licet petitas ratiocinationes ex referente derivantur. Immo vero utrinque otium & pax fuit quæsitæ. Non placebat armorum strepitus amplius Sigismundo Regi sapienti, non etiam Alberto supremo Ordinis Magistro: unde perspicuum redditur, tolerabiles pacis condiciones fuisse

fuisse quæſitas, quæ partem utramque ad pacem perpetuam pangendam ſervandamque inclinarent : Verique ſimile eſt, imo certiffimum, Ruſdorfiana conventa meliora & utrique belligerantium accommodatiora viſa, durumque & ſtriſtum, ne pax ulla ratione ſufflaminaretur, haud temere fuiſſe abſciſſum ſublatumque. De qua enixa voluntate ne ſcrupulus ullus relinqueretur, geminata ac generaliter repetita eſt ante memorata relatio in litteris inveſtituræ Alberto Friderico conceſſis : ubi denuo pactorum cum Magiſtris ordinis generalibus initorum memoria iteratur ac denuo inculcatur, ut ne per errorem in renovationem omnium privilegiorum à Rege Sigismundo aliquid peregrini dicatur inſertum. Actus enim geminati majorem firmitatem inducunt, quia, quod repetitur majorem conſultationem ac de-

G

libe-



liberationem arguit. Quo ex fundamento Jcti deducunt, geminatum consensum vim jurati consensus quandoque adipisci, mirumque propterea eo magis videtur, Polonos respuere pacta Rusdorianana, quæ in instrumentis diversis tum generatim tum speciatim sincere sunt renovata atque approbata.

§. III.

Quæ res sine dubio effecit, ut aliqui Polonorum statum controversiæ rursum immutare sint ausi. Jam enim ad leges feudi confugiunt, easque strictissime observari cum investituræ literis cupiunt, quas accepisset primus Borussiae Dux Albertus Marchio. In illis enim neque Vitulam memorari; neque aliquid de dominio dimidio etiam acutissime cernentibus ac legentibus occurrere. In quo quidem

dem nihil falsi enunciant. Sed quis à silentio hoc arguet, Borussis jus Domini in Vistula fuisse propterea ademptum? Notoria sine præjudicio silentio transmittuntur, nec ut allegentur necessitatis, sed voluntatis tantum est. Atqui manifestum erat, dimidium flumen Polonos separasse à Crucigeris, quorum in locum & eminentia jura succedebat Dux novus. Et licet aliquando notoria dicantur, quæ non sunt; neutiquam tamen id applicari ad thema nostrum potest. Nam in ipsis investituræ litteris Alberto datis clare invenitur, ut novus dux *directuras per terram in FLUMINIBUS & MARI sicuti utile visum fuerit, stabiliat*. Qui vero id generatim in fluminibus permittit, nec aliquid speciatim excipit, is sane ab oratione generali remove Vistulam non potest, qui ceteroquin est fluviorum maximus. Adde,



permissum denique fuisse Serenissimo Alberto, ut *apud Regiam Majestatem in Consiliis, comitiis & publicis conventibus proximum locum habere debeat ac denique jurisdictionem & potestatem illam in terris suis exerceat, quam aliquis Princeps regni melius dignoscitur in terra quam habet.* Atque nobiles Poloni omnes, sicuti Herburtus de Fulstein in statutis Regni Poloniæ adnotat Tit. *Flumen in constit:* Sigismundi A. 1507. jus habent trajiciendi propriis pontonibus in fluminibus, quæ regia bona & Subditorum determinant; & Princeps post Regem in Polonia summus ejus generis libertatem non habeat in Vistula, cui alioquin summum in fluminibus jus generatim est concessum? Sed salva res est, & exinde quam maxime probatur, jus hoc fuisse notorium nec speciatim proinde Vistulam debuisse nominari, cum Sigismundus

dus Rex in mente semper habuerit pacta  
 Rusdorfiana, quæ in renovatione omni-  
 um privilegiorum diserte sunt nominata,  
 confirmata, ac reducta, ita ut nulla ra-  
 tionabilis dubitandi ratio suppetat, per lit-  
 teras investituræ primas arctius fuisse no-  
 vum Ducem constrictum. Potius inferi-  
 mus, omissum quod fuit in litteris investi-  
 turæ, nec verbis est expressum, merito  
 suppleri ex pactis & jure antea competen-  
 te, ac legibus & constitutionibus subse-  
 quentibus. Sed adsunt pacta Rusdorfia-  
 na ante investituram Alberti, in quibus  
 Crucigero ordini dominium imperiumque  
 pro medietate Vistulæ tribuitur, eaque  
 renovata sunt post investituram in reno-  
 vatione omnium privilegiorum ac sancte  
 confirmata à Sigismundo Augusto, Alber-  
 tum Fridericum ducem investiente. Quæ

G. 3 illa-



illationi videatur firma & inconcussa, ostendunt Poloni, quare igitur renovata sint pacta Rusdorsiana, eorumque toties mentio facta? Renovatio nihil novi juris addit, sed potius tituli prioris continuatio est, eoque dominium pro medietate Vistulæ in ipsa repetitione de novo comprobatum merito videtur. Quod adhuc magis conficit, in literis investituræ primi Ducis idem fuisse sub jure fluminum generatim præsuppositum, & *subintellectum*, quia ex post facto iterum, pacis perpetuæ inter Vladislaum Regem & Rusdorsium initæ evidentibus verbis memoria est integrata, sive id à Regibus Sigismundo & Sigismundo Augusto proprio motu, sive ad instantiam Borussiarum Ducum, boni ordinis causa, atque ad dubia in futurum tollenda, sit factum. Sat est, ad modum & mensuram ejus pacis dominium Borussiarum

siæ Ducum pro dimidio fuisse agnitum.  
 Eam agnitionem solutio tertii grossi adhuc  
 luculenrius indicat : & dominium vero  
 exercitium juris in isto flumine non solum  
 in se complectitur, sed & omnes actus  
 possessorios legitime defendit; ita ut du-  
 bium non sit, quin Serenissimo Borussiae  
 Regi minime possit vitio verti, si post ar-  
 bitrariam intermissionem, cujus causam  
 singularem in capite II. abunde significavi-  
 mus, proprias exstrui rates jubeat, quibus  
 transvehantur homines, milites & res  
 aliæ ad necessitatem & commoditatem  
 quæcunque, prioribus pacis foederibus  
 congruenter.


#### §. IV.

Istud vero, quod forte objici adhuc  
 de medietate fluminis posset, ac si Borus-  
 siæ Principibus ac Regibus tantum pro di-  
 midio





midio fluminis propriis uti pontonibus liceret, vel nihil est, vel facile diluitur. Nam sicuti Poloni ab una ripa ad alteram transvectionem suam extendunt; etsi tantum ad medium alvei imperium dominiumque eorum pertingit; ita idem indulgendum est alterius portionis certissimis dominis ac possessoribus, aut neutri id tribui juris poterit. Sed instant Poloni exercitio suo; itaque ex iisdem argumentis instat Borussia Rex juri semel acquisito; neque se ab illo exercendo dimoveri ulla ratione patietur; idque, quia & veritati facti & æquitati prorsus convenit, à Polonis nunquam amplius iri deductum in controversiam, iustissime sperat,


















Biblioteka Jagiellońska



sidr0022388



